


# Kaassassuk



<b>Oqaluttuaq</b>	<b>Iliusissaq</b>
<p>Maannakkut iliansuup Kaassassup oqaluttuassartaata ilaminerna tusassavarsi. Tassa pissarsuangeranorneranut tunngasoq tusaassavarsi. Oqaluttuap sinnera, Kaassassuup inoqatiminut akiniaaneranut tunngasoq ilissi nammineq atuarsinnaavarsi.</p> <p>Itsarooq aappareeqarpoq meerartaaraangamik meerannguaminnik toqusoortartunik. Taamaallutik ernertaarput Kaassassumillu atserpaat. Angajoqqaavisa assut asallugulu erligeqaat qujangeqaallu. Taamaallutik angajoqqaavi napparput tamarmillu toqullutik. Kaassassuk angajoqqaveruppoq, iliarsororpoq. Taamaattoqarniariarmat Kaassassuk illoqataasa ilaasa meerarsiartaaraat. Timmippallaartaqimmat pisarioqimmallu angajoqqaarsiaasa pigiumajunnaarpaat. Illoqataasa allat tigummialaareeraallu allat tigummialeraraat. Naggataatigut kingulliup paamut igimmagu niviarsiatoqarsuup igalermiup naakkigilerlugu ernersiartaaraa.</p> <p>Kaassassuk suusupagineqarpoq mikingaaramilu nammineq katakkut qaqsinnaangimmat illoqataasa sorluinnaasigut tigullugu kivittarpaat illumullu appakaallugu.</p>	<p>Meeqqat marluk peqataassapput.</p> <p>Niaqqup qaava tangiartorneqassaaq (massage-neqassaaq).</p>

<p>Nerisuutaaginnarmat kingutitaartorlugu kingutaartarpaat asuli nerisuutaannginniassammat.</p> <p>Aniileraangat meeraqataasa eqqisisitinneq ajorpaat naalliutsittarlugulu. Kaassassuk meeraqataasa mittatigisarpaat allaat sorlukassai anarsuinik immertarlugit.</p> <p>Taamaalluni Kaassassuup kammaata angutip utoqqarsuannortup Kaassassuk oqarfigaa: "Uummaannguaaraa naalliutsitaavallaaleqaatit, angusinnaanngorukku pavunga talorsuarnut pisuttuarniarina.</p> <p>Taappavunga piguit imak suaartarumaarputit: "Pissaap Inua qaali, maaniippunga." Pissaap inuata ornippatit ersinaveersaassaatit".</p> <p>Tamanna Kaassassuup angerlarami puiunngilaa eqqarsaatigalugulu.</p>	
<p>Aqaguani Kaassassuk Talorsualiarpoq. Aqqutaani orpikkat nusuttaraluarpai ujaqqallu kiveriartaraluarlugit tamaasali artorpai. Tassa taama nukeqanngitsigaaq.</p> <p>Talorsuarmut pigami suaartalerpoq: "Pissaap Inua qaaniarit, maaniippunga. Pissaap inua qaaniarit, maaniippunga"! Suaartaleruttortoq qimmersuaq inuttut kiinalik nueriataarpoq soorluli qangatasorsuaq. Asuuna oqariataarpoq: "Qangali taamatut suaartarneqarama aatsaat suaartarneqaqqippunga. Pamiorsuannut nerngunniarit najummatserlutillu taava issugiukkaluttuttuaqaakkit"! Kaassassuup ersigiusattunnguamik sajuttuinnaalluni allatut ajornaqimmat ornikkamiuk pamiorsuanut nermuppoq. Meqqorsui tigullugit piareerniariartoq Pissaap Inuata issugiuppaa. Kaavilerpoq, kaavilerpoq, naggataagullu erfagiussaalluni. Nikuinniariarmat Pissaap Inuata oqarfigaa, kingumut qiviaqqullugu. Kaassassuk kingumut qiviariallarami, pinnguaaqqat amerlassusii. Pissaap inuata oqarfigaa: "Tassa allinaveeqqutitit"! Suli aamma marloriarlugu issugiutillarpaa. Maannakkullu pinngussat katatai ikileriarsimapput. Pissaap Inuata aqagumut aggeqqoqqippaa. Kaassassuk ammukarami soorlumi oqilisimalluni assullu imminut oqigaaq. Ujarakasiit isimmikkunigit paffa, paffa. Orpigarsuit nusukkunigit soorlu ivigannguit.</p> <p>Aqaguani majuaqqippoo. Aasiit Pissaap Inuata pamiorsuanut nermukkami erfagiutippoo. Kingumut qiviarami sukkut tamaana</p>	<p>Natermi iliusissaq ingerlanneqassaaq.</p> <p>Meeqqap aappaa natermi nallagassaaq aappaatalu ajattarlugu assakaatissavaa.</p>

<p>taamaallaat pinnguaqarpoq. Aappasaanik erfagiutikkami taama pinnguaqaraluangilaq. Asu Pissaap Inuata oqarfiaa: "Tassa inuinnarni pissarsuanngorputit. Kingorna orneqqissanngilarma! Nukitit isertuutissavatit, aatsaallu piffissanngorpat atorumaarpatit".</p>	
<p>Pissaap Inuata Kaassassuk unnerpaa ukiaru nunaqqatini qisorujussuarmik qississukkumaarai. Ukiorpallu sikulluni nunaqqatini atiminni nanorsuarnik pingajoqqanik pisaqaassukkumaarai. Tassalu ukiarmat Kaassassup unnuakkut nunaqqatimi sininneranni qissiarsuaq majuuppaa nunamullu kappullugu. Nunaqataalu ullaakkut iteramik tupigusoqaat uisakajaarlutillu paasisinnaanngilaammi kiap qissiarsuaq taanna nunamut qaqillugu majuussimaneraa. Ukiormat sikullunilu nunaqqatai suaartalerput atiminni iluliarsuup qaani nanorsuit pingajoqqat qaqisimanerarlugit. Arnarsiarsuami kamissui ateriarlugit, qiimmaallariarluni tuaviinnaq Kaassassuk anivoq. Anigami takuai nanorsuit pingajoqqat iluliarsuup qaavaniittut. Kaassassuup isiginnaariarlugit aterfigai. Iluliarsuup ataanut inuit katersuussimapput. Nunaqqataasaluasiit Kaassassuk nikanarsarpaat maajunnarnerarlugulu. Kaassassuup saneqquariarlugit iluliarsuup qaanut majualerpoq. Iluliarsuup qaanut qaqillunilu Kaassassuup nanorsuit pingajoqqat ornilerpai. Qaqiniariartoq nanorsuup arnavissap Kaassassuk tunuatigut avatersuaminik patippaa, Kaassassulli sumillu sooq nikerianngilaq. Taamaanniariartoq Kaassassuup nanorsuup kingulliivi illuttut tigoriarlugit iluliarsuup qaanut anaarluppaa toqullugulu. Nanoq piarsarsuaq nerinnanngit aamma saassussigaluarpoq, taanna aamma assinganik pineqarpoq. Piarakasik minneq illuinnarminik tigoriarlugu niaqquni qulaateriarlugu inuppasuut tungaanut naluppaa oqarlunilu: "Aana ilissi pissarsi". Inuit Kaassassummut pitsaasaarnialeqaat Kaassassuulli tusaanngitsuusaarlugit saneqquaannarpai. Nannullu sinneruttut marluk illuttorluni uniarpai arnarsiarsuaminullu majuullugit. Arnarsiarsuani oqarfiaa: "Alleqtassarsillutillu qipissarseqaakkit"! Arnarsiarsua tuppallernermik taamak nilleraluungilaq.</p> <p>Tassa tusareerparsi iliarsuup Kaassassuup qanoq ililluni</p>	<p>Natermi iliusissaq ingerlanneqassaaq. Meeqqap aappaa natermi nallagassaaq aappaatalu nissui tangiartussavai (massage-ssavai)</p>

pissarsuannngorsimanera, soorlu oqareernittut oqaluttuap sinnera ilissi nammineq atuarsinnaavarsi.	
--	--